

միշտ շահել:

Մնապաշտ ժողովուրդը աղւէսին է վերագրում մի շարք ջղային հիւանդութիւններ, որոնց մէջ մեծ դեր է խաղում ինքնհիպնոզը-ինքնաներշնչումը: Այնպէս որ, ճապոնը ունի իր աղւէսից բռնաձեները, ինչպէս որ Միջին դարերը իրանց դիւահարներն ունէին:

Հիւանդութիւնը մօտաւորապէս նոյնն է, ինչ մեր ընկնաւորներինը: Նրան առհասարակ աւելի ենթակայ են գիւղացի կանայք, իբրեւ աւելի սնահաւատ տարր:

Անհատի եսը, որի մէջ մտել է աղւէսը, դառնում է երկու: Մէկը հիւանդն է, միւսը աղւէսը, որ շարունակ խօսում է նրա բերանով ու վիճում է նոյն իսկ նրա հետ մի տարբեր, օտարոտի ձայնով: Նա է, որ հիւանդին խելքիցը հանում է, վագել է տալիս փողոցով վայրի ճիչերով, կամ նետում է գետին՝ փրփուրը բերնին:

Բայց ինչպէս որ աղւէսը ինքն է մտնում ու տիրում մարդուն, այնպէս էլ սնահաւատ ժողովրդի հաւատով կան մարդիկ, որ մի մասնաւոր իշխանութիւն ունեն աղւէսների վրա: Եւ ահա դրանց է, որ դիմում է սնահաւատ ճապոնացին իրեն բռնող աղւէսից ազատելու համար: Այդ տեսակէտից մասնաւոր մեծ հռչակ ունեն նիշիրեն աղանդի քուրմերը, որոնք գալիս են հիւանդի մօտ, սկսում են խօսակցել աղւէսի հետ ու պարգեւներ խոստանալով մի կէրպ ստիպում են, որ աղւէսը թողնի հիւանդի մարմինը: Եւ հիւանդը իսկապէս բժշկւում է, ի հարկէ՝ նորից հիպնոզով:

Անշուշտ քաղաքակրթութեան ոյժի առաջ այդ սնապաշտութիւնը հետզհետէ կորցնում է իր նախկին թափը: Գիւղական դպրոցը նրա ամենաառաջին թշնամին է: